



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

**Sumáriu Kazu
Tribunál Distritál Oekusi
Outubru 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 24

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	11
Artigu 145 (KP), konjuga ho artigu 2, 3, no 35(b) no 36 (LKVD), ho artigu 20 kona-ba arma branca husi lei nú. 5/2017	Krime arma brankas ho ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	1
Artigu 141 KP	Interrupsaun ba gravidéz	1
Artigu 139 KP, konjuga ho artigu 2, 3, no 35(b) no 36 (LKVD)	Omísidiu agravadu ho natureza violénsia doméstika no tipu ilísitu sira kona-ba violénsia doméstika.	1
Artigu 138 KP, 23 KP, 24 KP konjuga ho artigu 2, 3, no 35(b, c) no 36 (LKVD)	Tentativa omísidiu simples ho natureza violénsia doméstika no tipu ilísitu sira kona-ba violénsia doméstika.	1
Artigu 259 KP	Danu agravadu	2
Artigu 316 KP	Kontrabandu	2
Artigu 225 KP	La halotuir obrigasaun alimentár	1
Artigu 157 KP	Ameasa	1
Artigu 207 KP	Kondusaun sem karta	3
Totál		24

2. Totál desizaun ne'ebé JSMP monitoriza: 17

Tipu desizaun	Artigu	Númeru
---------------	--------	--------

Suspensaun ba prizaun nia ezekusaun	Artigu 68 KP	11
Pena multa	Artigu 67 KP	2
Admoestasaun	Artigu 82 KP	3
Omologa pedidu dezisténsia keixa	-	1
Totál		17

3. Totál kazu sira ne'ebé kontinua prosesu tuir JSMP nia monitorizasaun: 7
B. Deskripsaun sumáriu julgamentu ba desizaun kazu sira

1. Krime ofensa ba integridade fízika simples ho natureza violénsia doméstika

Nú. Prosesu : 0080/22.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 2 suspende ba tinan 2

Iha 03 Outubru 2022, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SU hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 01 Juñu 2022, maizumenus iha oras tuku 12:00 meiodia arguidu buti dala ida iha lezada nia kakorok, tebe dala ida iha kelen parte loos no rakut lezada nia fuuk dala ida no dudu ba iha parede. Antes ne'e lezada deskonfia arguidu amante ho fetu seluk, arguidu ho lezada diskute malu, arguidu nerbosu halo agresaun refere hasoru lezada. . Konsekuensia husi arguidu nia hahalok ne'e rezulta lezada sofre moras. Kazu ne'e aneksu hamutuk ho relatóriu médiku husi Ospitál Referral Oekusi no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun, no depoisde akontesementu arguidu arepende nninia hahalok, arguidu dame malu kedas ho lezada, to'o agora moris hamutuk nafatin hanesan feen-laen, foin primeiravés mai hatan iha tribunál, promete sei larepete tan hahalok hanesan iha futuro, serbisu hanesan toos na'in laiha rendementu fiksi kada fulan no arguidu iha oan na'in rua.

Enkuantu lezada kontinua konfirma faktu sira hotu iha akuzasaun no reforsa arguidu nia deklarasaun depoisde akontesementu arguidu ho lezada dame malu kedas no to'o agora laiha ona problema seluk tan.

Alegasaun finál

Prokuradór intende katak arguidu nia hahalok ne'e konsidera provadu tanba iha audénsia arguidu rasik konfesa integralmente no arguidu nia hahalok ne'e priense duni elementu krime ofensa ba integridade fízika simples ho natureza violénsia doméstika hasoru nia feen. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu aplika pena prizaun tinan 1 suspende ba tinan 1.

Enkuantu iha defeza nia alegasaun hateten katak aktu violénsia ne'e mosu tanba provoka husi lezada rasik tanba sempre deskute malu ho arguidu kona-ba arguidu amante ho fetu seluk.

Defeza argumenta katak iha audénsia arguidu rasik konfesa faktu hotu iha akuzasaun, arrepende ba nia hahalok, dame malu ona no to'o agora moris hamutuk nafatin hanesan feen ho laen, foin primeiravés mai hatan iha tribunál, promete sei larepete tán hahalok ne'e iha futuro, serbisu hanesan toos na'in laiha rendementu fiksi kada fulan no ekonomikamente arguidu mak iha responsabilidade máximu ba nia feen ho nia oan na'in rua. Tanba ne'e, defeza solisita ba tribunál atu aplika pena ne'ebé adekuadu ba arguidu tuir nia sala.

Desizaun

Depois avalia faktu sira hotu, tribunál konsidera arguidu komete krime hasoru lezada, arguidu rasik konfensa. Tribunál mós prova katak konsekuensia husi arguidu nia hahalok ne'e rezulta lezada sofre moras no konsidera arguidu nia hahalok hanesan dolu direitu.

Bazeia ba faktu provadu hirak ne'e hotu no tetu mós ba sirkunstansia agravantes no atenuantes sira hotu ne'ebé haleu ona iha krime ne'e. Tribunál konklui prosesu ne'e no kondena arguidu ho pena prizaun tinan rua maibé suspende ba tinan rua nafatin, importante arguidu labele kontinua komete kualker krime ruma durante iha período suspensaun.

2. Krime ofensa ba integridade fízika simples ho natureza violénsia doméstika

Nú. Prosesu : 0004/19.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 suspende ba tinan 1

Iha 04 Outubru 2022, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve husi arguidu VT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 09 Abril 2019, maizumenus iha oras tuku 10:00 dadeer, arguidu basa dala rua iha lezada nia hasan parte karuk, rasta lezada no tuku dala rua iha lezada nia kanuruk rezulta lezada sofre moras. Antes ne'e arguidu la hatan lezada atu ba partisipa iha serimonia kultura nian tanba osan laiha no sira diskute malu to'o arguidu

halo agresan referê hasoru lezada. Kazu ne'e aneksu hamutuk ho relatôriu médiku husi Ospítal Referal Oekusi no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente katak loos duni arguidu basa lezada dala ida iha hasan karuk la'os dala rua no kona-ba faktu sira seluk arguidu nega totalmente. Arguidu arrepende ona nia hahalok, sedauk diak malu tanba lezada mak lakohi ona atu moris hamutuk ho arguidu, serbisu hanesan *seguransa guardamor* ho rendimentu kada fulan US\$115.00, foin primeiravés mai iha tribunál, promete sei larepete tán hahalok ne'e iha futuru no arguidu iha oan na'in rua.

Enkuantu lezada kontinua konfirma faktu hotu iha akuzasaun no deklara katak depoisde akontesementu arguidu ho lezada to'o agora seidauk dame malu, lezada lakohi ona moris hamutuk ho arguidu tanba antes no depois akontesementu mós arguidu sempre baku lezada no durante ne'e lezada mak haree no tau matan ba nia oan nain rua.

Alegasaun finál

Prokuradór intende katak arguidu nia hahalok ne'e kruel teb-tebes hosi lezada rasik mak rezeita lakohi ona atu kontinua moris hanesan feen-laen tanba iha audensia lezada rasik deklara katak arguidu sempre halo agresan fízika hasoru lezada. Prokuradór haktuir tan katak arguidu nia hahalok ne'e priense duni elementu krime ofensa ba integridade fízika simples ho natureza violénsia doméstika hasoru nia feen tuir faktu ne'ebé hakerek ona iha akuzasaun mesmu arguidu rasik nega faktu balun. Tanba ne'e, prokuradór laiha dvida ba faktu sira hotu iha akuzasaun no husu ba tribunál atu aplika pena ne'ebé hakerek ona iha akuzasaun.

Enkuantu defeza hateten katak arguidu iha kolaborasaun di'ak ho tribunál hodi konfesa faktu parsialmente, arrepende ninia hahalok, arguidu hakarak dame malu ho nia feen no kontinua moris hamutuk hanesan feen-laen maibé lezada rasik mak lakohi ona atu moris hamutuk ho arguidu hanesan laen kaben, serbisu hanesan *seguransa guardamor* ho rendimentu kada fulan US\$115.00, foin primeiravés mai iha tribunál, promete sei larepete tán nia hahalok ne'e iha futuru no arguidu iha oan na'in rua hela ho lezada. Tanba ne'e, defeza solisita ba tribunál atu aplika pena ne'ebé adekuadu ba arguidu tuir nia sala.

Desizaun

Depoisde avalia ba faktu sira hotu, tribunál konsidera faktu ne'ebé loos makarguidu basa lezada dala rua iha lezada nia hasan parte karuk, rasta lezada dala ida no tuku dala rua iha lezada nia kanuruk hodi rezulta lezada sofre moras.

Bazeia ba faktu provadu hirak ne'e hotu no tetu mós sirkunstánsia agravantes no atenuantes sira ne'ebé haleu iha krime ne'e. Nune'e tribunál konklui prosesu ne'e no kondena arguidu ho pena prizaun tinan ida no suspende ba tinan ida.

3. Krime lahalo tuir obrigasaun alimentár

Nú. Prosesu : 0017/22.PDOEC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Pena admoestasau

Iha 04 Outubru 2022, Tribunál Distritál Oekusi prezide leitura sentensa ba krime lahalo tuir obrigasaun alimentár ne'ebé envolve husi arguidu Vicente Tabin hasoru nia oan na'in rua ne'ebé reprezenta husi rekerente inan Ermelinda Falo, iha Distritu Oekusi.

Akuzasaun Prokuradór

Prokuradór akuza katak iha 13 Jullu 2021, arguidu sai husi sira nia uma husik hela feen ho oan na'in rua ba iha perigu nia laran nune'e lezada deside lori nia oan na'in rua ba hela hamutuk ho lezada nia inan-aman to'o agora no arguidu nunca tau matan ba nia oan na'in rua.

Prokuradór akuza arguidu kontra artigu 225 KP kona-ba krime lahalo tuir obrigasaun alimentár ho moldura penál to'o tinan 3 ka multa.

Produsaun ba prova sira

Iha julgamentu, arguidu konfesa parsialmente katak labarik na'in rua ne'e arguidu ninia oan duni no iha Jullu 2022, arguidu fó fos saku ida, pasta ida kalsa ho faru tahan tolu no osan US\$5.00. Arguidu konfesa katak loos duni antes no depois arguidu la-apoiu hahan ba iha nia oan na'in rua. Arguidu serbisu *seguransa guardamor* ho rendimentu kada fulan US\$115.00, foin primeiravés mai iha tribunál, seidak di'ak malu tanba arguidu ho nia oan sira hela keta-ketak.

Enkuantu lezada kontinua konfirma faktu hotu iha akuzasaun no deklarata katak depoisde arguidu sai no husik hela lezada ho nia oan na'in rua, lezada ho nia oan nain rua hasoru problema moris loro-loron nian, sira susar atu hetan hahan, ikus lezada desida lori sai nia oan na'in rua ba hela hamutuk fali ho lezada nia inan-aman to'o agora. Lezada konfirma katak loos duni arguidu fó duni dala ida fos saku ida no rupa tahan tolu ne'e iha Dezembru 2021 la'os iha Jullu 2022. Lezada dehan katak depoisde ida ne'e to'o agora arguidu nunca ba haree ka fó apoiu ruma ba nia oan na'in rua.

Alegasaun finál

Prokuradór intende katak arguidu nia hahalok ne'e priense duni elementu krime la-halo tuir obrigasaun alimentár hasoru nia oan na'in rua tanba depoisde arguidu sai husi uma fó apoiu aihan ba vítima na'in rua dala ida de'it iha fulan Dezembru 2021 no depoisde ida ne'e to'o agora arguidu nunca fó aihan ruma ba oan na'in rua hodi fó perigu ba sira nia oan na'in rua. Prokuradór reforsa liu tan katak arguidu sei iha forsa no iha kondisaun atu serbisu buka aihan hodi bele sustensa nia oan sira nia nesesidade lor-loron iha futuru.

Tanba ne'e, prokurador laiha duvida ba faktu sira hotu iha akuzasaun no husu ba tribunál atu aplika pena tuir artigu 225 KP.

Enkuantu defeza hanoin katak arguidu iha kolaborasaun di'ak ho tribunál hodi konfesa faktu parsialmente, arguidu rekoñese duni labarik na'in rua ne'e arguidu ninia oan no iha Jullu 2022, arguidu fó fos saku ida, pasta ida kalsa ho faru tahan tolu no osan US\$5.00. Defeza salienta liu tan katak arguidu rekoñese duni hahalok ne'e bele hamosu perigu ba nia oan na'in rua no promete sei tau matan ba nia oan na'in rua iha futuru, arguidu serbisu *seguransa guardamor* ho rendimentu kada fulan US\$115.00, foin primeiravés mai hatan iha tribunál, seidak di'ak malu tanba arguidu ho nia oan sira hela keta-ketak. Tanba ne'e, defeza solisita ba tribunál atu aplika pena ne'ebé adekua ba arguidu tuir nia sala naran katak labele hatama arguidu iha prizaun, nune'e bele kontinua serbisu hodi sustensa nia oan sira iha futuru.

Desizaun

Depoisde avalia ba faktu sira hotu ne'ebé tribunál prova katak iha 13 Jullu 2021, arguidu sai duni husi sira nia uma husik hela feen ho oan na'in rua ba iha perigu nia laran nune'e lezada deside lori nia oan na'in rua ba hela hamutuk ho lezada nia inan-aman to'o agora. Tribunál prova liu tan katak iha fulan Jullu 2022, arguidu fó fos saku ida, pasta ida, kalsa ho faru tahan tolu no osan US\$5.00 mesmu iha lezada nia deklarasaun konfirma katak fó duni maibé iha Dezembru 2022 la'os iha Jullu.

Bazeia ba provas sira ne'e hotu no tetu mós sirkunstansia hotu-hotu ne'ebé haleu iha krime ne'e. Tribunál konklui prosesu ne'e no kondena arguidu ho pena admoestasaun ho konsiderasaun katak arguidu la-fó fulan-fulan maibé iha fulan balun sempre fó no arguidu mós promete sei tau matan ba ninia oan na'in rua.

4. Krime ofensa ba integridade física simples ho natureza violéncia doméstika

Nú. Prosesu	: 0022/22.OEPMK
Kompozisaun Tribunál	: Singulár
Juis	: Dr. Yudi Pamukas
Prokurador	: Dr. Pedro Baptista Aleixo dos Santos
Defeza	: Dr. Paulo Nunes husi JSMP (Pessoa idonia)
Desizaun	: Pena prizaun tinan 1 suspende ba tinan 1

Iha 04 Outubru 2022, Tribunál Distritál Oekusi prezide leitura sentensa ba krime ofensa ba integridade física simples ho natureza violéncia doméstika ne'ebé envolve husi arguidu JP hasoru nia feen, iha Distritu Oekusi.

Akuzasaun Prokurador

Prokurador akuza katak iha 19 Maiu 2022, maizumenus iha oras tuku 14:00 meidia, arguidu basa lezada dala ida iha hasan loos hodi rezulta lezada sofre moras. Antes ne'e arguidu haruka lezada atu tesi arguidu nia liman kukun maibé lezada lakohi, arguidu nerbosu halo agresaun refere hasoru lezada. Kazu ne'e aneksa hamutuk ho relatóriu médiku husi Pradet no fotografia kona-ba aktu violéncia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente, arguidu hatene katak hahalok hanesan ne'e ladiak, arepende ninia hahalok, depoisde akontesementu lezada ho arguidu di'ak malu ona, moris hamutuk nafatin iha uma ida hanesan feen-laen, foin primeiravés mai hatan iha tribunál, promete sei larepete tán hahalok hanesan iha futuro, serbisu hanesan funsionariu kontratadu ho rendementu kada fulan US\$260.00 no iha ona oan na'in rua.

Enkuantu lezada kontinua konfirma faktu hotu iha akuzasaun lezada konfirma depoisde akontesementu arguidu ho lezada dame malu kedas no moris hamutuk nafatin hanesan feen-laen to'o agora no arguidu foin primeiravés halo agresaun hasoru lezada.

Alegasaun finál

Prokuradór intende katak hahalok arguidu provadu no priense duni elementu krime ofensa ba integridade fízika simples ho natureza violénsia doméstika hasoru nia feen mesmu arguidu basa dala ida de'it. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu aplika pena multa US\$80.00 ba arguidu ho taxa diariu kada loron US\$1.00.

Enkuantu defeza konsidera hahalok arguidu ne'e sala duni tuir lei tanba basa lezada dala iha hasan loos hodi rezulta lezada sofre moras maibé iha produsaun ba prova mós arguidu iha kolaborasaun di'ak ho tribunál hodi konfesa faktu integralmente. Tanba ne'e, defeza solisita ba tribunál atu aplika pena admoestasaun ba arguidu ho konsiderasaun katak arguidu arrepende ninia hahalok, di'ak malu ona, foin primeiravés mai hatan iha tribunál, promete sei larepete tán hahalok hanesan iha futuro, iha ona oan na'in rua no kuandu aplika pena multa bele hatodan tan ekonomia família tanba serbisu hanesan funsionáriu kontratadu iha DHS ho rendementu kada fulan US\$260.00 no laiha kondisaun ekonomia atu bele sustenta neseseidade família nian.

Desizaun

Depoisde avalia faktu sira hotu, tribunál konsidera arguidu nia hahalok ne'e provadu no priense duni elementu krime ofensa ba integridade fízika simples ho natureza violénsia doméstika, tribunál prova katak arguidu basa lezada dala rua iha hasan parte loos rezulta lezada sofre moras.

Bazeia ba provas hirak ne'e hotu no tetu mós sirkunstansia agravantes no atenuante isra hanesan, hahalok arguidu hanesan dolu direitu, aktu krime ne'e hasoru de'it arguidu nia feen, konfesa faktu integralmente, arepende ninia hahalok, di'ak malu ona moris hamutuk nafatin iha uma ida hanesan feen-laen, foin primeiravés mai hatan iha tribunál, promete sei larepete tán hahalok hanesan iha futuro, serbisu hanesan funsionáriu kontratadu ho rendementu kada fulan US\$260.00 no iha ona oan na'in rua. Tanba ne'e, tribunál konklui

prosesu ne'e no kondena arguidu ho pena prizaun tinan ida suspende nia ezekusaun ba períodu ne'ebé hanesan.

5. Krime ameasa

Nú. Prosesu : 0026/22.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Omologa pedidu dezisténsia keixa

Iha 04 Outubru 2022, Tribunál Distritál Oekusi prezide julgamentu tentativa konsiliaun ba kazu krime ameasa ne'ebé envolve arguidu Domingos dos Remedios ho arguidu Agostinho Maniquin hasoru lezadu Rui Manuel Sequira, iha Aldeia Noapai, Suku Cunha, Sub-distritu Pante-makasar, Distritu Oekusi.

Akuzasaun Prokuradór

Prokuradór akuza arguidu katak iha 19 Abril 2022, iha oras tuku 17:53 lokraik, Lezadu tula nia ferik oan atu ba sentru votasaun hodi hala'o knaar hanesan fiskais. Bainhira to'o iha kruzamentu Noapai no arguidu sira hakilar ba lezadu katak "*Viva Fretilin, a luta continua*". Depois arguidu Domingos hakilar tan katak "*o nia isin ne'e besi ga, ne'e tuku ladiak ga?*", maibé lezadu nonok de'it no laresponde buat ruma hasoru arguidu sira. Arguidu Domingos continua tolok ho liafuan ladiak no ameasa lezada. dehan "*baku ita bo'ot ladiak ga*". Tanba ne'e maka halo lezadu sente tauk foti motor halai hases-an tiha husi fatin akontesementu o ba hato'o kedas keixa ba iha polísia.

Prokuradór akuza arguidu sira kontra artigu 157 KP kona-ba krime ameasa ho moldura penál to'o tinan 2 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira ho lezadu.

Iha prosesu konsiliaun ne'e, lezadu hakarak dame malu de'it ho arguidu sira sein kondisaun ruma tanba sira hela iha bairo ka aldeia ida de'it maibé lezadu husu ba arguidu sira atu labele continua repete hikas sira nia hahalok hirak ne'e iha futuro. Enkuantu husi arguidu sira mós konkorda ho pedidu lezadu nian no deklarata katak arrepende sira nia hahalok no promete sei la repete tan hahalok hanesan iha futuro, nune'e lezadu husu ba tribunál atu deziste tiha ninia-keixa hasoru arguidu sira.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia keixa husi lezadu. Nune'e tuir artigu 262 número 2 KPP, tribunál konklui prosesu ne'e no omologa kedas akordu pedidu dezisténsia keixa no absolve arguidu sira husi prosesu ne'e sein kondisaun ruma.

6. Krime ofensa ba integridade fízika simples ho natureza violénsia doméstika

Nú. Prosesu : 0021/22.OEPMK
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena admoestasau

Iha 05 Outubru 2022, Tribunál Distritál Oekusi prezide leitura sentensa ba kazu ofensa ba integridade fízika simples ho natureza violénsia doméstika ne'ebé envolve arguidu SA hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 17 Maiu 2022, maizumenus iha oras tuku 18:00 lokraik, arguidu buti lezada nia kakorok dala ida rezulta lezada sofre moras. Antes arguidu ho lezada diskute malu tanba lezada siak ka hirus arguidu nia feen primeiru ninia oan sira, arguidu. Tanba ne'e. Kazu ne'e aneksu hamutuk ho relatóriu médiku husi Pradet no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no hatene buti lezada nia kakorok bele sofre moras maibé arguidu ho hakarak rasik mak buti lezada nia kakorok. Arguidu haktuir tan katak depoisde akontesementu lezada mak ba apresenta keixa iha polísia no kontinua ba iha uma mahon maibé la hela iha ne'ebá. Depoisde akontesementu arguidu sente hahalok hanesan ne'e ladiak no arrepende ninia hahalok, di'ak malu ona, foin primeiravés mai hatan iha tribunál, promete sei larepete tán hahalok hanesan iha futuru, serbisu hanesan toos na'in laiha rendementu fiksi kada fulan no iha oan na'in haat.

Prokuradór husu ba tribunál atu presinde lezada nia deklarasaun no husi parte defeza laiha opozisaun. Tanba ne'e, tribunál bazeia ba pedidu ne'e no presinde lezada nia deklarasaun tanba arguidu rasik konfesa ona faktu hotu iha akuzasaun.

Alegasaun finál

Prokuradór konsidera arguidu komete duni agresaun hasoru lezada no arguidu nia hahal, arguidu buti lezada nia kakorok dala ida rezulta lezada hetan kanek kois no moras.. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu kondena arguidu ho pena prizaun fulan 6 no suspende ba tinan 1.

Enkuantu husi defeza alega katak iha produsaun ba prova, arguidu kolabora di'ak ho tribunál hodi konfesa faktu integralmente, arguidu arrepende ninia hahalok, foin primeiravés mai hatan iha tribunál, promete sei larepete tán hahalok ne'e iha futuru, serbisu hanesan to'os na'in laiha rendementu fiksi kada fulan no iha oan na'in haat. Tanba ne'e, defaza husu ba tribunál atu aplika pena ne'ebé kmaan ba arguidu tuir nia sala.

Desizaun

Depoisde avalia ba faktu sira hotu tribunál prova arguidu buti duni lezada nia kakorok dala ida rezulta lezada sofre moras no konsidera arguidu nia hahalok ne'e hanesan dolu direitu.

Bazeia ba faktu provadu hirak ne'e hotu no tetu mós ba sirkunstansia agravantes no atenuantes sira hotu ne'ebé haleu iha krime ne'e. Tribunál konklui prosesu ne'e no kondena arguidu ho pena admoestasaun.

7. Krime ofensa ba integridade física simples ho natureza violência doméstica

Nú. Prosesu : 0073/22.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Sr. Paulo Nunes husi JSMP (Pessoa idonia)
Desizaun : Pena prizaun tinan 1 suspende ba tinan 1

Iha 06 Outubru 2022, Tribunál Distritál Oekusi prezide leitura sentensa ba krime ofensa ba integridade física simples ho natureza violência doméstica ne'ebé envolve husi arguidu APT hasoru nia feen MQT ho sira oan JT (tinan 17), iha Distritu Oekusi.

Akuzasaun Prokuradór

Prokuradór akuza katak iha 19 Maiu 2022, maizumenus iha oras tuku 09:00 dader, arguidu tuku nia feen kona iha liman fuan klaran rezulta moras, naksala no monu ba rai, hafoin basa dala ida iha lezadu nia hasan loos rezulta lezadu sofre moras. Antes ne'e lezada MQT diskute malu ho arguidu kona-ba lezada empresta osan US\$10.00 iha lezada nia inan fó ba lezadu Julio sein koñesementu arguidu. Hafoin arguidu bolu lezada MQT hodi husu tuir kona-ba lezada impresta osan ne'e, arguidu nerbozu no halo agresaun refere hasoru lezada. Kazu ne'e aneksa hamutuk ho relatóriu médiku husi Ospital Referral Oekusi no fotografia kona-ba aktu violência ne'e hasai husi polícia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b ho c) no 36 LKVD.

Produsaun ba prova sira

Iha julgamentu, arguidu konfesa faktu integralmente, arguidu arrepende ninia hahalok, diak malu ona ho lezada no lezadu (sira nia oan), foin primeiravés mai hatan iha tribunál,

promete sei larepete tán hahalok hanesan iha futuru, serbisu hanesan funksionáriu publiku ho rendementu kada fulan US\$222.00 no iha ona oan na'in tolu.

Prokuradór husu ba tribunál atu presinde lezada ho lezadu nia deklarasaun no husi parte defeza laiha opozisaun. Tanba ne'e, tribunál bazeia ba pedidu ne'e no presinde lezada ho lezadu nia deklarasaun tanba arguidu rasik konfesa faktu hotu iha akuzasaun.

Alegasaun finál

Prokuradór intende katak hahalok arguidu provadu no priense duni elementu krime ofensa ba integridade fízika simples ho natureza violénsia doméstika hasoru nia feen ho nia oan mane no tuir loloos mesmu arguidu mak tenke proteje lezada ho lezadu husi kualker aktu violénsia mesmu mosu provokasaun oi-oin maibé atu fó solusaun ba problema la'os ho violénsia. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu aplika pena prizaun tinan 1 suspende ba tinan 1.

Enkuantu defeza konsidera arguidu prátika krime hasoru nia feen ho nia oan hodi rezulta lezada ho lezadu sira sofre moras no ida ne'e kontra leimaibé iha produsaun ba prova mós arguidu iha kolaborasaun di'ak ho tribunál hodi konfesa faktu hotu iha akuzasaun. Arguidu mós arepende ninia hahalok, diák malu ona ho lezada no lezadu, foin primeiravés mai hatana iha tribunál, promete sei larepete tán hahalok hanesan iha futuru, serbisu hanesan funksionáriu publiku ho rendementu kada fulan US\$222.00 no iha ona oan na'in tolu. Tanba ne'e, husu ba tribunál atu konsidera liu ba sirkunstansia atenuantes no aplika pena ne'ebé justu tuir arguidu nia sala.

Observasaun: iha JSMP nia observasaun nota katak antes ne'e prokuradór halo akuzasaun keta-ketak ba arguidu ne'ebé halo agresaun hasoru nia feen ho número prosesu; 0073/22.OESIC no hasoru nia oan ho número prosesu 0072/22.OESIC, maibé antes ba iha produsaun ba prova no tribunál halo apenso ba número prosesu rua ne'e tanba konsidera aktu akontese iha fatin ida de'it, lora ida no oras ida. Nune'e prokuradór ho defeza aseita ho tribunál nia despaxu no kontinua ba iha julgamentu.

Desizaun

Depoisde avalia faktu sira hotu tribunál konsidera arguidu sala duni tanba iha 19 Maiu 2022, maizumenus iha oras tuku 09:00 dadeer. Arguidu ho nerboju tuku lezada (nia feen) kona iha liman fuan klaran rezulta moras, naksala no monu ba rai. Tribunál mós prova katak arguidu halo agresaun hasoru lezadu (nia oan), basa dala ida lezadu iha hasan parte loos rezulta lezadu sofre moras. Tribunál prova katak hahalok arguidu priense duni elementu krime ofensa ba integridade fízika simples ho natureza violénsia doméstika no hahalok arguidu konsidera hanesan dolu direito.

Tanba ne'e, bazeia ba faktu provadu hirak ne'e hotu no tetu mós ba sirkunstansia hotu-hotu ne'ebé haleu ona iha krime ne'e. Tribunál konklui prosesu ne'e no kondena arguidu ho pena prizaun tinan ida suspende ba tinan ida.

8. Krime ofensa ba integridade fízika simples ho natureza violénsia doméstika

Nú. Prosesu : 0067/22.OESIC

Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 suspende ba tinan 1

Iha 06 Outubru 2022, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SPF hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 16 Maiu 2022, maizumenus iha oras tuku 20:00 kalan, arguidu uza kapasete baku dala ida iha lezada nia kabas parte karuk, basa dala ida iha hasan parte karuk no tuku dala iha kanuruk rezulta lezada sofre moras. Antes ne'e lezada ba serbisu iha *restorante* ne'ebé loke durante pameran sein koñesementu husi arguidu, nune'e arguidu ho lezada diskute malu, arguidu nerbosu no halo agresaun refere hasoru lezada. Kazu ne'e aneksu hamutuk ho relatóriu médiku husi Ospital Referral Oekusi Pradet no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente, arguidu arrepende ninia hahalok, depoisde akontesementu arguidu ho lezada dame malu kedas no too agora moris hamutuk nafatin hanesan feen-laen, foin primeiravés mai hatan iha tribunál, promete sei larepete tán hahalok hanesan iha futuro, arguidu hanesan dezempregadu laiha rendimentu fiksi kada fulan no iha oan na'in tolu.

Enkuantu lezada kontinua konfirma faktu hotu iha akuzasaun no deklarata katak antes ne'e lezada fó hatene ona arguidu kona-ba lezada serbisu ho padraun ne'ebé loke stand-restorante iha pameran. Lezada dehan katak depoisde akontesementu liu tiha lora ida arguidu ho lezada dame malu no kontinua moris hamutuk hanesan feen-la'en to'o agora.

Alegasaun finál

Prokuradór iha nia alegasaun hateten katak durante iha audénsia arguidu rasik konfesa ba faktu hotu iha akuzasaun no konsidera arguidu nia hahalok ne'e priense duni elementu krime ofensa ba integridade fízika simples ho natureza violénsia doméstika hasoru nia feen. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu kondena arguidu ho pena prizaun tinan 1 suspende ba tinan 1.

Enkuantu husi defeza alega katak iha produsaun ba prova, arguidu kolabora di'ak ho tribunál hodi konfesa faktu integralmente, arguidu arrepende ninia hahalok, depoisde akontesementu arguidu ho lezada dame malu kedas no to'o agora moris hamutuk nafatin hanesan feen-laen, foin primeiravés mai hatan iha tribunál, promete sei larepete tán

hahalok hanesan iha futuru, arguidu hanesan dezempregadu laiha rendimentu fiksi kada fulan no iha oan na'in tolu. Tanba ne'e, defaza husu ba tribunál atu aplika pena ne'ebé kmaan ba arguidu tuir nia sala.

Desizaun

Depoisde avalia ba faktu sira hotu, tribunál konsidera arguidu prátika duni krime ofensa ba integridade fízika simples ho natureza violénsia doméstika hasoru nia feen. Arguidu uza kapasete baku lezada dala ida iha kabaas parte karuk, basa dala ida iha hasan parte karuk no tuku dala iha kanuruk rezulta lezada sofre moras.

Bazeia ba faktu provadu sira ne'e hotu no tetu mós sirkunstansia agravantes no atenuante sira hanesan arguidu halo agresaun ne'e hasoru nia feen no krime sira hanesan ne'e barak ona rejista aas iha oekusi kompara ho munisípiu sira seluk, arguidu konfesa, arrepende ninia hahalok, di'ak malu ona, promete sei lapete tán ninia hahalok hanesan iha futuru, arguidu dezempregadu laiha rendimentu fiksi kada fulan, oan na'in tolu. Tanba ne'e, tribunál konklui prosesu ne'e no kondena arguidu ho pena prizaun tinan ida suspnede ba tinan ida.

9. Krime ofensa ba integridade fízika simples ho natureza violénsia doméstika

Nú. Prosesu : 0061/22.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Afonso Gomes Fatima
Desizaun : Pena prizaun tinan 1 suspende ba tinan 1

Iha 10 Outubru 2022, Tribunál Distritál Oekusi prezide leitura sentensa ba kazu ofensa ba integridade fízika simples ho natureza violénsia doméstika ne'ebé envolve husi arguidu WL hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 10 Maiu 2022, maizumenus iha oras tuku 22:00 kalan, arguidu uza kadeira masa ida hodi baku dala ida iha lezada niaulun rezulta ulun kanek ki'ik, ran sai, bubu no sofre moras. Antes ne'e lezada diskunfia arguidu amante ho fetu seluk, arguidu nerbosu no halo agresaun hasoru lezada. Kazu ne'e aneksu hamutuk ho relatóriu médiku husi Ospitál Referal Oekusi liuhusi Pradet no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun, depoisde akontesementu arguidu arrepende ninia hahalok, di'ak malu ona ho lezada no kontinua moris hamutuk nafatin hanesan feen-laen, foin primeiravés mai hatan iha tribunál, promete sei larepete

tán hahalok hanesan iha futuru, arguidu serbisu hanesan toos na'in laiha rendimentu fiksi kada fulan no iha oan na'in lima.

Prokuradór husu ba tribunál atu presinde lezada nia deklarasaun no husi parte defeza laiha opozisaun. Tanba ne'e, tribunál bazeia ba pedidu ne'e no presinde lezada nia deklarasaun tanba arguidu rasik konfesa ona faktu hotu iha akuzasaun.

Alegasaun finál

Prokuradór iha nia alegasaun hateten katak durante iha audensia arguidu rasik konfesa ba faktu hotu iha akuzasaun no konsidera arguidu nia hahalok ne'e priense duni elementu krime ofensa ba integridade fízika simples ho natureza violénsia doméstika hasoru de'it nia feen. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu aplika pena ne'ebé hakerek ona iha artigu 145 KP.

Enkuantu alegasaun defeza hateten katakarguidu kolabora di'ak ho tribunál hodi konfesa faktu integralmente. Defeza haktuir tan katak depoisde akontesementu arguidu arrepende ninia hahalok, di'ak malu ona ho lezada no kontinua moris hamutuk hanesan feen ho laen, foin primeiravés mai hatan iha tribunál, promete sei larepete tán hahalok hansen iha futuru, arguidu serbisu hanesan toos na'in laiha rendimentu fiksi kada fulan no iha oan na'in lima. Tanba ne'e, husu ba tribunál atu aplika pena ne'ebé adekuadu ba arguidu tuir nia sala.

Desizaun

Depoisde avalia ba faktu sira hotu. tribunál konsidera arguidu provadu no preense duni elementu krime violénsia doméstika konjugadu ho artigu 145 husi KP. Tribunál mós prova arguidu uza kadeira masa ida baku dala ida iha lezada ulun rezulta ulun kanek ki'ik, ran sai, bubu no sofre moras no hahalok ne'e tribunál konsidera dolu direitu.

Bazeia ba faktu provadu hirak ne'e hotu no tetu mós sirkunstansia hotu-hotu ne'ebé haleu iha krime ne'e, nune'e tribunál konklui prosesu ne'e no hili liu pena ne'ebé di'ak liu no merese ba arguidu nia hahalok ne'e mak pena prizaun maibé suspende nia ezekuasaun ba período ne'ebé hanesan.

10. Krime ofensa ba integridade fízika simples ho natureza violénsia doméstika

Nú. Prosesu	: 0093/22.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Pedro Baptista Aleixo dos Santos
Defeza	: Dr. Calisto Tout
Desizaun	: Pena prizaun fulan 6 suspende ba tinan 1

Iha 11 Outubru 2022, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EQ hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 11 Juñu 2022, maizumenus iha oras tuku 07:00 dadeer, arguidu dudu dala ida iha lezada nia ulun no kaer iha lezada nia fuuk rasta lezada ba estrada hodi rezulta lezada sofre moras. Antes ne'e arguidu ho lezada diskute malu kona-ba osan atu sosa fos maibe osan lato'o tanba arguidu uza tiha osan US\$1.00 hodi sosa tabako joker (tabako sek), nune'e arguidu lasimu no halo agresaun hasoru lezada. Kazu ne'e aneksu hamutuk ho relatóriu médiku husi Pradet no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no depoisde akontesementu arguidu arepende ninia hahalok. Arguidu haktuir tan katak depoisde akontesementu lezada ho arguidu di'ak malu ona to'o agora moris hamutuk nafatin iha uma ida hanesan feen-laen, foin primeiravés mai hatan iha tribunál, promete sei larepete tánhahalok hanesan iha futuru, serbisu hanesan toos na'in laiha rendimentu fiksi kada fulan no arguidu ho lezada moris hamutuk hetan ona oan na'in rua.

Enkuantu lezada kontinua konfirma faktu hotu iha akuzasaun no depoisde akontesementu arguidu ho lezada kontinua dame malu kedas no moris hamutuk nafatin hanesan feen ho laen too agora no arguidu foin primeiravés kaer nia fuuk rasta.

Alegasaun finál

Prokuradór intende katak hahalok arguidu provadu no priense duni elementu krime ofensa ba integridade fízika simples ho natureza violénsia doméstika. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu aplika pena prizaun tinan 1 suspende ba periodu ne'ebé hanesan.

Enkuantu defeza konsidera aktu krime ne'e akontese tanba mosu provokasaun husi lezada ne'ebé koalia hela de'it kona-ba osan US\$1.00 ne'ebé arguidu uza hotu ona. Defeza reforsa liu tan katak krime ne'e akontese duni, arrepente ninia hahalok, diak malu ona, foin primeiravés mai iha tribunál, serbisu hanesan toos na'in laiha rendimentu fiksi kada fulan, oan na'in rua no ekonomikamente arguidu mak iha responsabilidade maximu ba sira nia família. Tanba ne'e, defeza solisita ba tribunál atu tetu ba sirkunstansia hotu-hotu ne'ebé haleu iha krime ne'e no husu ba tribunál atu aplika pena admoestasaun.

Desizaun

Tribunál konsidera arguidu nia hahalok ne'e provadu no priense duni elementu krime ofensa ba integridade fízika simples ho natureza violénsia doméstika tanba iha 11 Juñu 2022, maizumenus iha oras tuku 07:00 dadeer, arguidu dudu duni lezada nia ulun dala ida no kaer iha lezada nia fuuk rasta ba estrada hodi rezulta lezada sofre moras.

Bazeia ba faktu provadu sirane'e hotu no tetu mós sirkunstansia agravante no atenuante sira hanesan, hahalok arguidu konsidera hanesan dolu direitu, aktu krime ne'e hasoru de'it arguidu nia feen, konfesa faktu integralmente, arepende ninia hahalok, di'ak malu ona no to'o agora moris hamutuk nafatin iha uma ida hanesan feen ho laen, foin primeiravés mai hatan iha tribunál, promete sei larepete tán hahalok hanesan iha futuru, serbisu hanesan toos na'in laiha rendimentu fiksi kada fulan no iha ona oan na'in rua. Tanba ne'e, tribunál konklui prosesu ne'e no kondena arguidu ho pena prizaun fulan neen suspende durante tinan ida.

11. Krime ofensa ba integridade fízika simples ho natureza violénsia doméstika

Nú. Prosesu : 0016/21.OEPSB
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Afonso Gomes Fatima
Desizaun : Pena admoestasaun

Iha 11 Outubru 2022, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LB hasoru nia oan (tinan 19), iha Distritu Oekusi.

Akuzasaun Prokuradór

Prokuradór akuza katak iha 28 Maiu 2021, maizumenus iha oras tuku 07:45 dadeer, arguidu foti ai-lamtoro (ai-kafé) sanak ida baku lezadu iha kotuk laran rezulta lezadu sofre moras. Antes ne'e arguidu deskonfia lezadu mak ta'a ai-lamtoro (ai kafé),tanba ne'e mak arguidu hirus no halo agresaun hasoru lezadu. Kazu ne'e aneksu hamutuk ho relatóriu médiku husi Sentru Saúde Pasabe no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(c) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun foin primeiravés mai hatan iha tribunál, promete sei larepete tán hahalok ne'e iha futuru hasoru nia membru família ka ema seluk, di'ak malu ona ho lezadu, serbisu hanesan toos na'in laiha rendimentu fiksi kada fulan no arguidu mak iha responsabilidade ekonomikamente ba nia família no arguidu iha ona oan na'in lima.

Prokuradór husu ba tribunál atu preside deklarasaun husi lezadu no husi parte defeza laiha opozisaun. Tanba ne'e, tribunál bazeia ba pedidu hirak ne'e no presinde lezadu nia deklarasaun tanba iha produsaun ba prova arguidu rasik konfesa faktu integralmente.

Alegasaun finál

Prokuradór intende katak hahalok arguidu provadu no priense duni elementu krime ofensa ba integridade fízika simples ho natureza violénsia doméstika no tuir loloos arguidu mak tenke preteje lezadu sira husi kualker aktu krime oi-oin maibé pelukontrariu arguidu mak prátika fali krime ne'e hasoru ninia oan. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu aplika pena prizaun fulan 6 suspende ba tinan 1 ba arguidu.

Enkuantu parte defeza alega katak arguidu konfesa katak baku duni nia oan dala ida lori ai-kafé maibé depoisde akontesementu no kontinua dame malu ona, arepende ninia hahalok, foin primeiravés mai hatan iha tribunál, promete sei larepete tán hahalok hanesan iha futuru hasoru nia membru família ka ema seluk, serbisu hanesan toos na'in, laiha rendimentu fiksi kada fulan no arguidu mak iha responsabilidade ekonomikamente ba nia família no arguidu iha ona oan na'in lima. Tanba ne'e, defeza husu ba tribunál atu aplika pena ne'ebé adekua ba arguidu tuir nia sala.

Desizaun

Depoisde avalia ba faktu sira hotu, tribunál konsidera arguidu halo duni agresaun hasoru lezadu, arguidu foti ai-lamtoro (ai-kafé) sanak ida baku duni lezadu iha kotuk laran dala ida rezulta lezadu sofre moras.

Bazeia ba faktu provadu hirak ne'e hotu no tetu mós ba sirkunstansia agravante no atenuante sira ne'ebé haleu iha krime ne'e. Nune'e tribunál konklui prosesu ne'e no kondena arguidu ho pena admoestasaun ho konsiderasaun katak arguidu foin primeiravés mai hatan iha tribunál, konfesa, arrepende ninia hahalok, promete sei larepete tán hahalok hanesan iha futuru, lori ai-kafé baku dala ida de'it iha lezadu nia kotuk laran no arguidu mak tau matan ba nia membru família sira ba nessesidade moris lor-loron nian.

12. Krime ofensa ba integridade fízika simples ho natureza violénsia doméstika

Nú. Prosesu	: 0088/21.OEPMK
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Sr. Paulo Nunes husi JSMP (Pessoa idonia)
Desizaun	: Pena prizaun tinan 1 suspende ba tinan 1

Iha 13 Outubru 2022, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve husi arguidu JT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 21 Setembru 2021, maizumenus iha oras tuku 10:00 dadeer, arguidu tuku dala ida iha lezada nia kanuruk, tuku dala ida iha kabun no dudu iha lezada nia knosen parte karuk halo lezada monu tun ba rai no arguidu nia hahalok ne'e rezulta lezada hetan mean no moras. Antes ne'e arguidu diskunfia lezada faan tiha batar balu, tanba arguidu haree sira nia batar komesa menus, arguidu nerbosu no halo agresaun

hasoru lezada. Kazu ne'e aneksu hamutuk ho relatóriu médiku husi Pradet no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu parsialmente, arguidu dudu de'it lezada dala ida iha knosen parte karuk no ba faktu sira seluk arguidu nega hotu. Depoide akontesementu arguidu arrepende ninia hahalok, depoide akontesementu lezada ho arguidu to'o agora sedauk di'ak malu no hela keta-ketak, foin primeiravés mai hatan iha tribunál, promete sei larepete tán hahalok hanesan iha futuru, serbisu hanesan toos na'in laiha rendementu fiksi kada fulan no iha ona oan na'in neen.

Enkuantu lezada kontinua konfirma faktu hotu iha akuzasaun no depoide akontesementu arguidu ho lezada kontinua moris ketak-ketak no lezada mak hela hamutuk ho sira nia oan na'in tolu hodi tau matan ba sira no oan sira seluk hela ho arguidu.

Testemuña Imelda Teme hanesan arguidu ho lezada sira nia oan fetu haktuir katak momentu akontesementu ne'e testemuña laiha fatin maibé so depoide akontesementu mak testemuña ba no hetan informasaun ne'e husi lezada tuir buat ne'ebé hakerek ona iha akuzasaun.

Alegasaun finál

Prokuradór intende katak hahalok arguidu provadu no priense duni elementu krime ofensa ba integridade fízika simples ho natureza violénsia doméstika hasoru nia feen mesmu iha audensia julgamentu arguidu rasik konfensa parsialmente maibé prokuradór konsidera faktu sira iha akuzasaun loos hotu. Tanba ne'e, prokuradór laiha dúvida ba faktu sira hotu iha akuzasaun no husu ba tribunál atu aplika pena prizaun efetiva fulan neen ba arguidu ho konsiderasaun durante iha produsaun ba prova arguidu lakoopera di'ak ho tribunál.

Enkuantu defeza tetu no alega katak durante iha produasaun ba prova arguidu rasik konfesa faktu parsialmente tanba arguidu só apenas dudu de'it lezada dala ida iha ninia knosen parte karuk hodi rezulta lezada sofre moras. Tanba ne'e, defeza tetu ba aktu krime ne'ebé mak hatodan no hakaman arguidu nia responsabilidade kriminal no husu ba tribunál atu aplika pena ne'ebé justu ba arguidu tuir nia sala ho konsiderasaun katak depoide akontesementu arguidu arepende ninia hahalok, to'o agora seidauk di'ak malu no hela keta-ketak, foin primeiravés mai hatan iha tribunál, promete sei larepete tán hahalok hanesan iha futuru, serbisu hanesan toos na'in laiha rendementu fiksi kada fulan no iha ona oan na'in neen.

Desizaun

Depoisde avalia ba faktu sira hotu, tribunál konsidera hahalok arguidu provadu no preinse duni elementu krime ofensa integridade fízika simples ho natureza violénsia doméstika, arguidu tuku lezada dala ida iha kanuruk, tuku dala ida iha kabun mesmu arguidu rasik nega no rekoñese dudu de'it lezada nia knosen parte karuk hodi rezulta lezada hetan mean, moras no monu tun ba rai.

Bazeia ba faktu provadu hirak ne'e hotu no tetu mós sirkunstansia agravantes no atenuantes hanesan arguidu konfesa parsialmente arguidu so dudu de'it lezada maibé ba faktu sira seluk arguidu nega hotu, arguidu arepende ninia hahalok, to'o agora seidak di'ak malu no hela keta-ketak, foin primeiravés mai hatan iha tribunál, promete sei larepete tán hahalok hanesan iha futuro, serbisu hanesan toos na'in laiha rendementu fiksi kada fulan no iha ona oan na'in neen.

Tanba ne'e, tribunál konklui prosesu ne'e no kondena arguidu ho pena prizaun tinan ida maibé suspende nia ezekuasaun ba periodu durante tinan ida.

13. Krime ofensa ba integridade fízika simples ho natureza violénsia doméstika

Nú. Prosesu : 0041/22.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 suspende ba tinan 1

Iha 13 Outubru 2022, Tribunál Distritál Oekusi lihusi ofisiál justisa notífika depaixu leitura sentensa ba kazu ofensa ba integridade fízika simples ho natureza violénsia doméstika ne'ebé envolve arguidu AS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 14 Abril 2022, iha oras tuku 17:30 lokraik, arguidu buti dala ida iha lezada nia kakorok, tuku dala ida iha hirus matan, uza ai-pedasuk ida baku dala ida iha liman parte loos no dala iha kotuk laran. Arguidu mós kontinua tuku lezada dala ida iha ren-toos hodi rezulta lezada desmai no monu tun ba rai. Konsekuensia husi arguidu nia hahalok ne'e rezulta lezada hetan bubu, mean, metan no sofre moras. Kazu ne'e aneksu hamutuk ho relatóriu médiku husi Ospital Referál Oekusi no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente depois akontesementu arrepende ninia hahalok, di'ak malu ona, foin primeiravés mai hatan iha tribunál, promete sei larepete tán hahalok hanesan iha futuro, serbisu hanesan toos na'in laiha rendementu fiksi kada fulan no iha oan na'in ida.

Prokuradór husu ba tribunál atu presinde lezada nia deklarasaun no husi parte defeza laiha opozisaun. Tanba ne'e, tribunál bazeia ba pedidu ne'e no presinde lezada nia deklarasaun tanba arguidu rasik konfesa ba faktu hotu iha akuzasaun.

Alegasaun finál

Prokuradór konsidera faktu sira hotu iha akuzasaun ne'e loos hotu tanba iha produsaun ba prova arguidu rasik konfesa integrelemente. Prokuradór reforsa liu tan katak tuir loloos arguidu mak tenke proteje lezada husi kualker aktu violénsia oi-oin maibé pelu kontrariu arguidu rasik mak prátika fali agresaun fízika hasoru fali ninia feen ne'ebé lor-loron sempre prepara hahan ba arguidu atu han ho familia. Tanba ne'e, prokuradór husu ba tribunál atu aplika pena ne'ebé hakerek ona iha akuzasaun artigu 145 KP konjugadu ho artigu 2 numeru 1^o e 2^o, artigu 3 alinea a no artigu 35 alinea b husi lei nú. 7/2010 kona-ba LKVD.

Enkuantu husi partre defeza alega katak iha produsaun ba prova, arguidu kolabora di'ak ho tribunál hodi konfesa faktu integralmente. Defeza salienta liu tan katak depoisde akontesementu arguidu sente hahalok hanesan ne'e ladiak no arrepende ona ba nia hahalok, foin primeiravés mai hatan iha tribunál, promete sei larepete tán hahalok hanesan iha futuru, serbisu hanesan toos na'in laiha rendementu fiksi kada fulan no iha oan na'in ida. Tanba ne'e, defaza husu ba tribunál atu aplika pena ne'ebé kmaan ba arguidu tuir nia sala.

Desizaun

Depoisde avalia ba faktu hotu durante iha produsaun ba prova no tribunál konsidera hahalok arguidu sala duni tanba arguidu rasik rekoñese hotu faktu sira ne'ebé hakerek ona iha akuzasaun. Tribunál mós konsidera hahalok arguidu hanesan dolu direitu tanba ho hakarak rasik prátika krime hasoru de'it nia feen no laiha ema ruma mak obriga ka haruka arguidu atu prátika krime hasoru lezada.

Bazeia ba faktu provadu sira ne'e no tetu ba sirkunstansia agravantes no atenuante sira hotu ne'ebé haleu iha krime ne'e. Tribunál konklui prosesu ne'e no kondena arguidu ho pena prizaun tinan ida maibé suspende nia ezekusaun ba periodu ne'ebé hanesan.

14. Krime kondusaun sem karta

Nú. Prosesu : 036/22.PDOEC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Sr. Paulo Nunes (Pessoa idonia)
Desizaun : Pena prizaun fulan 6 suspende ba fulan 6

Iha 21 Outubru 2022, Tribunál Distritál Oekusi prezide julgamentu leitura sentensa ba prosesu sumáriu ba kazu krime kondusaun sem karta ne'ebé envolve husi arguidu Nocolau de Carlito Falo hasoru Estadu RDTL, iha Aldeia Sanane, Suku Costa, Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 19 Outubru 2022, maizumenus iha oras tuku 15:00 lokraik, arguidu lori motorizada ida ho marka Honda Suzuki halai iha dalan publiku área Masin sem karta kondusaun. Momentu ne'e, husi unidade polísia tranzito halo pasa revista ba arguidu no indetifika arguidu laiha karta kondusaun no laiha dokumentu motorizada timor nian só dokumentu Indonezia nian mak iha. Nune'e husi polísia tranzito halo keda indetifikasaun inklui halo aprensaun ba motorizada refere. Kazu ne'e aneksu hamutuk ho fotografia kona-ba objetu krime ne'e hasai husi polísia.

Prokuradór akuza arguidu kontra artigu 207 KP kona-ba krime kondusaun sem karta ho moldura penál to'o tinan 2 ka multa.

Produsaun ba prova sira

Iha julgamentu, arguidu konfesa faktu integralmente no hatene lori motorizada halai iha dalan publiku kontra lei no depoisde akontesementu arguidu arrepende ninia hahalok. Arguidu haktuir tan katak depoisde julgamentu ne'e sei buka osan hodi ba trata ninia sim inklui motorizada ninia dokumentu sira antes lori mai apresenta iha tribunál hodi bele foti hikas ninia motorizada no kontinua kondus motorizada hanesan babain. Arguidu promete sei larepete tán hahalok hanesan iha futuru, depoisde julgamentu no arguidu sei trata ninia karta kondusaun antes lori fali motor inklui dokuemntu motorizada ninian, arguidu hanesan estudante iha sekundariu klase rua, laiha rendimentu tanba sei dependensia ekonomia ba ninia inan-aman.

Prokuradór husu ba tribunál atu presinde testemuña husi polísia tranzito ninia depoimentu no husi parte defeza laiha opozisaun. Tanba ne'e, tribunál bazeia ba pedidu ne'e no presinde testemuña sira ninia depoimentu tanba iha produsaun ba prova arguidu rasik konfesa faktu hotu iha akuzasaun.

Alegasaun finál

Prokuradór iha nia alegasaun hateten katak arguidu nia hahalok ne'e provadu priense duni elementu krime kondusaun sem karta. Prokuradór akresenta liu tan katak arguidu hatene lori motor tinan rua ona maibé too agora sedauk iha karta kondusaun atu bele kondus motorizada iha dalan publiku. Tanba ne'e, prokuradór husu ba tribunál atu aplika pena multa ba arguidu atu iha futuru labele kontinua repete hikas nia hahalok no ema seluk labele halo tuir.

Enkuantu husi defeza konsidera arguidu ho boavontade kolabora di'ak ho tribunál hodi la-prejudika tribunál ba buka lialoos ba prosesu refere tanba arguidu rasik konfesa integralmente ba aktu ne'ebé komete ona. Defeza haktuir tan katak depoisde akontesementu arguidu arrepende ninia hahalok, promete sei larepete tán hahalok ne'e iha futuru tanba iha produsaun ba prova arguidu rasik deklarara, depoisde julgamentu ne'e sei buka osan hodi ba trata ninia karta kondusaun inklui motorizada ninia dokumentu sira antes lori mai apresenta iha tribunál hodi bele foti hikas ninia motorizada no kontinua kondus motorizada hanesan babain. Tanba ne'e, husu ba tribunál atu kondena arguidu

ho pena admoestasaun ho konsiderasaun katak arguidu foin primeiravés mai tribunál, hanesan estudante no sei iha dependensia ekonomia ba ninia inan-aman.

Desizaun

Depoisde avalia ba faktu sira hotu, tribunál konsidera arguidu kontra artigu 207 KP tanba arguidu kondus motorizada iha dalan publiku área masin sem karta kondusaun no arguidu hatene lori motorizada tinan rua ona maibé sedauk iha karta kondusaun. Tribunál konsidera hahalok sira hanesan seidauk hatene lori motorizada halai iha dalan publiku no arguidu nia hahalok konsidera hanesan dolo direitu tanba laiha ema ruma mak haruka arguidu atu kondus motorizada.

Bazeia ba faktu provadu hirak ne'e hotu no tetu mós sirkunstansia agravante no atenuante sira hotu ne'ebé haleu iha krime ne'e. Tribunál konklui prosesu ne'e no kondena arguidu ho pena prizaun fulan neen suspende ba fulan neen. Tribunál mós dehan katak depoisde julgamentu ne'e ba oin sei lautoriza arguidu kontinua kondus motorizada no entrega hikas motorizada ne'e ba arguidu wainhira arguidu laprezenta karta kondusaun ho dokumentu motorizada nian iha tribunál ho durasaun tenpu loron neen nulu.

15. Krime kondusaun sem karta

Nú. Prosesu : 661/22.PDOEC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Afonso Gomes Fatima
Desizaun : Pena multa

Iha 27 Outubru 2022, Tribunál Distritál Oekusi prezide julgamentu sumáriu ba krime kondusaun sem karta ne'ebé envolve husi arguidu Domingos Bole Colo hasoru lezadu hanesan Estadu RDTL, iha Aldeia Sanane, Suku Costa, Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 25 Outubru 2022 maizumenus iha tuku 10:00 dadeer, arguidu hetan pasa revista husi polísia tranzito wainhira kondus motorizada ho marka vixson laiha xapa madrikula tuir dalan publiku Numbey no indentifikadu laiha karta kondusaun. Kazu ne'e aneksu hamutuk ho fotografia kona-ba aktu krime refere ne'ebé hasai husi polísia.

Prokuradór akuza arguidu kontra artigu 207 KP kona-ba krime kondusaun sem karta ho moldura penál tinan too 2 ka multa.

Produsaun ba prova sira

Iha julgamentu, arguidu konfesa faktu integralmente katak loos duni arguidu kondus motorizada refere tuir dalan publiku iha Numbey laiha karta kondusaun no hatene lori motor desde tinan 2019. Arguidu deklara katak motorizada refere la'os ninian maibé nia aman nian, arrepende ninia hahalok, promete depoisde livre husu detensaun sei buka

osan hodi halo karta kondusaun ka sim antes kontinua kondus motorizada, arguidu hanesan estudante sekundariu palaban klase rua sei dependensia ekonomia ba nia inan-aman no foin primeiravés mai hatan tribunál.

Prokuradór husu ba tribunál atu presinde testemuña nia depoimentu tanba arguidu konfesa no husi defeza laiha opozisaun. Tanba ne'e, tribunál bazeia ba pedidu ne'e no presinde testamuña husi Unidade Polísia Tranzito tanba iha produsaun ba prova arguidu rasik konfesa faktu hotu.

Alegasaun finál

Prokuradór intende katak hahalok arguidu ne'e provadu tuir lei no konsidera priense duni elementu krime kondusaun sem karta. Prokuradór reforsa liu tan katak kuandu kondus motorizada laiha karta kondusaun sei nafatin konsidera lahatene ka seidak bele kondus motorizada tuir dalan publiku tanba bele prejudika ba ema seluk ninia vida iha dalan publiku sira. Tanba ne'e, husu ba tribunál atu kondena arguidu tuir pena ne'ebé hakerek ona iha artigu 207 husi KP.

Enkuantu defeza alega katak arguidu kolabora di'ak ho tribunál hodi konfesa faktu integralmente no depoisde akontesementu arguidu sente hahalok hanesan ne'e ladiak no kontra ona lei, arrepende ona. Defeza salienta liu tan katak motorizada refere laos arguidu ninian maibé nia aman nian, promete depoisde livre husu detensaun sei buka osan hodi ba halo karta kondusaun antes kontinua kondus motorizada, arguidu hanesan estudante sekundariu palaban klase rua sei dependensia ekonomia ba nia inan-aman no foin primeiravés mai tribunál. Tanba ne'e, defeza husu ba tribunál atu aplika pena ne'ebé justu ba arguidu.

Desizaun

Depoisde avalia ba faktu hotu ne'ebé produs durante iha produsaun ba prova no tribunál konsidera arguidu nia hahalok ne'e provadu tanba arguidu rasik konfesa halai motorizada tuir dalan publiku iha área Numbey laiha duni karta kondusaun. Tribunál mós prova katak hahalok sira hanesan ne'e priense duni elementu krime kondusaun sem karta tuir artigu 207 husi kodigu penál.

Bazeia ba faktu provadu hirak ne'e hotu no tetu mós ba sirkunstansia agravante no atenuante sira hotu ne'ebé haleu iha krime ne'e. Tribunál konklui prosesu ne'e no kondena arguidu ho pena multa US\$60.00 no kada lora sei selu US\$1.00 durante lora 60. Tribunál mós aplika pena alternativa ba arguidu durante lora 40 iha prizaun wainhira lakumpri desizaun refere hafoin lora 15 tranzitu en-julgadu no tribunál imediatamente liberta ona arguidu husi prosesu ne'e.

16. Krime kondusaun sem karta

Nú. Prosesu	: 658/22.PDOEC
Kompozisaun Tribunál	: Singuár
Juis	: Dr. Yudi Pamukas
Prokuradór	: Dr. Mateus Nesi
Defeza	: Dr. Afonso Gomes Fatima

Desizaun : Pena multa

Iha 27 Outubru 2022, Tribunál Distritál Oekusi prezide julgamentu sumáriu ba krime kondusaun sem karta ne'ebé envolve husi arguidu Aleixo Ricardo Sequeira hasoru Estadu RDTL, iha Aldeia Sanane, Suku Costa, Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 25 Outubru 2022 maizumenus iha tuku 09:30 dadeer, arguidu hetan pasa revista husi polísia tranzito wainhira kondus motorizada ho marka RX king, xapa matrikula A.1034 TL no marka koor azul tuir dalan publiku palaban no indentifikadu laiha karta kondusaun. Kazu ne'e aneksu hamutuk ho fotografia kona-ba aktu krime refere ne'ebé hasai husi polísia.

Prokuradór akuza arguidu kontra artigu 207 KP kona-ba krime kondusaun sem karta ho moldura penál tinan too 2 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun katak loos duni arguidu kondus motorizada refere tuir dalan publiku palaban laiha karta kondusaun tanba foin fila husi estudu iha Kupang-Indonezia seidak halo karta kondusaun. Arguidu hatene lori motor desde tinan 2020 no promete depoisde livre husi detensaun mak foin buka osan hodi halo karta kondusaun antes kontinua kondus motorizada. Arguidu deklar katak motorizada refere la'os ninian maibé nia maun nian, arrepende ninia hahalok, hanesan dezempregadu sei dependensia ekonomia ba nia inan-aman no foin primeiravés mai hatan iha tribunál.

Prokuradór husu ba tribunál atu presinde testemuña nia depoimentu tanba arguidu konfesa no husi defeza laiha opozisaun. Tanba ne'e, tribunál bazeia ba pedidu ne'e no presinde testemuña husi Unidade Polísia Tranzito tanba iha produsaun ba prova arguidu rasik konfesa faktu hotu.

Alegasaun finál

Prokuradór konsidera priense duni elementu krime kondusaun sem karta. Prokuradór reforsa liu tan katak arguidu hatene lori motorizada desde tinan 2020 maibé to'o agora seidak halo karta kondusaun. Tanba ne'e, arguidu nia hahalok ne'e konsidera prátika krime kondusaun sem karta dalabarak ona no husu ba tribunál atu kondena arguidu tuir pena ne'ebé hakerek ona iha artigu 207 husi KP.

Enkuantu defeza konsidera katak hahalok arguidu sala tanba halai motorizada tuir dalan publiku sem karta kondusaun maibé dalaruma mós iha situaun balun obriga duni arguidu tenke lori motorizada refere hodi bele atende nesiedade balun hanesan deklarasaun arguidu katak momentu ne'e uza motorizada ne'e tanba atu lori hahan ba nia pai ne'ebé baixa hela iha ospital referal oekusi to'o polísia pasa revista no halo aprensaun ba arguidu nia motorizada.

Defeza dehan katak arguidu kolabora di'ak ho tribunál hodi konfesa integralmente, sente hahalok hanesan ne'e ladiak no kontra ona lei, arrepende ona, motorizada refere laos arguidu ninian maibé nia maun nian, promete depoisde livre husu detensaun sei buka osan hodi ba halo karta kondusaun ka sim antes kontinua kondus motorizada, dezempregadu sei dependensia ekonomia ba nia inan-aman no foin primeiravés mai hatan tribunál. Tanba ne'e, defeza husu ba tribunál atu aplika pena ne'ebé adekuadu ba arguidu tuir nia sala.

Desizaun

Depoisde avalia ba faktu sira hotu, tribunál konsidera arguidu nia hahalok ne'e provadu tanba arguidu rasik konfesa katak halai motorizada tuir dalan publiku iha palaban laiha duni karta kondusaun. Tribunál mós prova katak hahalok sira hanesan ne'e priense duni elementu krime kondusaun sem karta tuir artigu 207 KP no hahalok arguidu konsideradu hanesan dolu direitu tanba arguidu rasik mak hakarak lori motorizada halai iha dala publiku mesmu arguidu hatene hela sedauk iha karta kondusaun atu bele lori motorizada halai iha dalan publiku sira.

Bazeia ba faktu provadu hirak ne'e hotu no tetu mós sirkunstansia hotu-hotu ne'ebé haleu iha krime ne'e, tribunál konklui prosesu ne'e no kondena arguidu ho pena multa US\$60.00 no kada loron sei selu US\$1.00 durante loron 60. Tribunál mós aplika pena alternativa ba arguidu durante loron 40 iha prizaun wainhira lakumpri desizaun refere hafoin loron 15 tranzitu iha julgadu no tribunál imediatamente liberta ona arguidu husi prosesu ne'e

17. Krime interrupsaun ba gravidéz

Nú. Prosesu : 0076/21.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Afonso Gomes Fatima
Desizaun : Prizaun tinan 1 suspende ba tinan 1 ba kada arguida ho arguidu

Iha 28 Outubru 2022, Tribunál Distritál Oekusi prezide leitura sentensa ba krime interrupsaun ba gravidéz ne'ebé envolve husi arguidu Martinho Falo ho arguida sira Izadora da Costa Teme ho Madalena Cusi (mate ona), iha Aldeia Sanane, Suku Costa, Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 28 Juñu 2021, maizumenus iha oras tuku 22:00 kalan, antes ne'e arguidu Martinho ho Izadora mantein relasaun seksuál tanba sira na'in rua iha relasaun namorada. Konsekuensia husi relasaun refere halo arguida Izadora isin rua foin fulan ida, tanba ne'e arguida Izadora ba hasoru nia namoradu arguidu Martinho husu osan US\$25.00 hodi tau hamutuk ho arguida nian hamutuk US\$50.00 halo pagamentu ba arguida Madalena Cusi nia kolen ba halo abortu ba labarik ne'ebé arguida izadora

kous ona. Kazu ne'e aneksu hamutuk ho relatóriu médiku husi Ospital Referral Oekusi no fotografia kona-ba aktu violénsia ne'e hasai husi polísia.

Prokuradór akuza arguidu ho arguida sira kontra artigu 141 KP kona-ba interrupsaun ba gravidéz ho moldura penál to'o tinan 3.

Produsaun ba prova sira

Iha julgamentu, arguidu ho arguida konfesa faktu integralmente katak sira na'in rua prátika duni hahalok ne'e hasoru sira nia oan tanba momentu ne'e sira na'in rua sei eskola hela foin klase 3 nivel sekundariu. Depoizde akontesementu arguidu ho arguida hatene katak hahalok hanesan ne'e ladiak no arepende sira ninia hahalok. Arguidu ho arguida foin primeiravés mai hatan iha tribunál, promete sei larepete tán hahalok hanesan iha futuru, serbisu hanesan toos na'in no *dona decasa* laiha rendementu fiksi kada fulan no iha ona oan na'in ida.

Prokuradór husu ba tribunál atu presinde depoimentu husi testemuña sira tanba arguidu ho arguida sira rasik konfesa no husi parte defeza laiha opozisaun. Tanba ne'e, tribunál bazeia ba pedidu ne'e no presinde testemuña sira nia depoimentu tanba arguidu ho arguida konfesa integralmente.

Alegasaun finál

Prokuradór intende katak hahalok arguidu ho arguida provadu no priense duni elementu krime interrupsaun ba gravidéz. Prokuradór mós hanoin katak situasaun sira hanesan ne'e iha nasaun seluk la kriminaliza maibé iha Timor-Leste hahalok sira hanesan ne'e kriminaliza tuir lei. Tanba ne'e, prokuradór husu ba tribunál atu aplika pena admoestasaun ba arguidu ho arguida ho konsiderasaun katak depoizde akontese to'o agora sira na'in kontinua hari'i ona uma kain moris hamutuk hanesan feen-laen iha ona oan na'in ida.

Enkuantu defeza tetu no alega katak durante iha produasaun ba prova arguidu ho arguida sira rasik konfesa faktu integralmente no defeza konsidera situasaun ne'e akontese tanba mosu presau husi parte família husi arguidu no arguida. Tanba ne'e, defeza husu ba tribunál atu absolve arguidu ho arguida maibé karik tribunál iha hanoin seluk, parte defeza husu justisa ne'ebé justu tuir arguidu ho arguida sira nia sala ho konsiderasaun katak arguidu ho arguida konfesa, arrepende, di'ak malu ona, hari'i ona uma kain no kontinua moris hanesan feen-laen no arguidu ho arguida responsabiliza ba sira nia moris loro-loron nian.

Desizaun

Depoizde avalia ba faktu sira hotu tribunál konsidera arguidu no arguida komete duni Krime interrupsaun ba gravidéz, arguidu ho arguida planea antes ona no halo pagamentu US\$50.00 ba arguida Madalena Cusi (mate ona) nia kolen hodi ba halo abortu ba labarik ne'ebé arguida izadora kous ona

Bazeia ba faktu provadu sira ne'e hotu no tetu mós ba sirkunstansia agravante no atenuante sira ne'ebé mak haleu iha krime ne'e. Tribunál konklui prosesu ne'e no kondena arguidu ho arguidu ho pena prizaun tinan ida suspende ba tinan ida ba kada arguidu ho arguida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl